



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim

tiryimyim@aolima

tir yimyim

TAPAK 7

France captain Lloris international football asaya nungi anener

Zelensky-i Medvedchuk ket nungi lisopur jenjang agin



VOL. XX NO. 90 (ADOK 90) DIMAPUR

RASEMNÜ (THURSDAY)

ANEJETI (JANUARY) 12, 2023

₹ 5.00

ACAUT Nagaland-i kin hoho 15 pusemer

Dimapur, January 11, 2023 (TYO): Nagaland nung kin hoho 15-i mapang shitak ka nung India sorkar dang Naga yimten latettsü osang sangoktsüba pusema nungiter aser parnok nem tenüngsang agütsür ta ACAUT Nagaland-i ashi.

Kin hoho 15-i August 31, 2019 nü ENPO kübok kin 6 aser Nagaland nung kin 8 ajanga bangjemtepba osang nenshiba atema pelar ta parnoki ashi.

"BJP-i 'yimten latettsü atema election' ta yimyim ayimba tu nisungtem ashioxtsütsü aser temulung melemtep adoktsü atema dang liasü ta kin hoho 15-i ashibaji kanga shitak. Anungji o tanang agi Naga nung mashioktsüsüla" ta ACAUT-i ashi.

"Nagaland nung kin hoho 15-i Prime Minister dang tekaratiba nung yimten latettsü shidi züluba ya Naga nungeri aginüa adokba ola ka lir saka India sorkari mangashir. Anungji BJP-i election nung nangzükba ama meinyakba atema Naga nungeri tamang makar aser jashir ta sayua yimdong nungi ola adoktsüla" ta

parnokisa metetdaksü.

"BJP indang central top leadership ajanga küm 26 tejangdang ceasefire tenzükba tembangtsü telemet ka magir. Parnoki linük temzüng nung ajemdaker election ang aginür aser nübortem ano maneni sarusaji khuret aser ochimashi agi timtema dang lidaktsünür, ajisüaka iba ajanga künü anogo Nagaland ya mepetmesü aser tashiyim agi asüngba lima ka akümtsü" ta ACAUT-isa metetdaksü.

Nagaland state nung nisung aika 'below poverty line' kübok alir aser mapa manguba khuret linük nung tamajungtiba lir. Yamai dang ao nungbo kobi melii Nagaland ya tamakok state ka akümtsü, ta parnokisa ashi.

"Naga nunger nungitba aser bangjemba onük ka Naga nunger kin hohotemi anir inyakdang Nagaland nung alirtemia parnok nungitsü aser asen külem tarutsü atema kechi tensa ajurudir ajuruaka inyaktsü renema alitsü ayongzüker" ta ACAUT Nagaland-isa metetdaksü.

CPO-i "Frontier Nagaland" meyipa repringshitsü mepishir

Kohima, January 11, 2023 (TYO): Chakhesang Public Organization (CPO)-i Eastern Naga nunger dang Naga nunger ka ama liyonga aotsü atema "Frontier Nagaland" state akhangba meyipa repringshiang ta mepishitsü lemtetogo.

Naga kibong nung teraksa agi sünger lia ano asenok tsüingda lemsaba ajanga tia tamajungba akümtsü ta CPO-i 41 buba General Session nung bangzüng ka renem. Iba sentong ya Phek district kübok Middle Khomi yimtsüng agi Mongulbarnü agiogo.

"Southern Angami, Mao aser Maram Khullen adianutem dang adianu tangatetba nung yimjung nung alitsü aser alemli nungi kibong ka ama tesentaktep lia aruba meraksatsü mepishitsü CPO-i bangjemtep" ta CPO

resolution committee convenor Nuzota Swuro-i ashi.

CPO-isa District Administration, NHIDCL aser Highway anasa aliba yimtsüngtem dang two-lane road mapa mendaka inyakba atema tenüngsang agütsütsü lemtet. Maneni contractor tem dang NHIDCL telatetba ama taniungba mapatongtem tembanga inyaktsü nenshitsü lemtet, ta Nuzota Swuro-isa ashi.

Iba sentong nung taoba DGP Nagaland Besesayo Kezo, IPS (Retd)-i "Living in the legacy of our leaders" onük jembi aser MLA Dr. Chotisuh Sazo, Chakhesang Gazetted Officers Association (CGOA) president Vekhosa Chakhesang o Tenyimi Peoples' Organisation president Timikha Koza nungeria o tatsütsü jembi.

Taküm December ita tashi ration angati angutsü

New Delhi, January 11, 2023 (Agencies): Centre sorkari taküm December ita tashi National Food Security Act (NFSA) kübok ration angati agütsütsü aser iba scheme dang Pradhan Mantri Garib Kalyan Ann Yojana (PMGKAY) ta ajatsü. Iba scheme kübok Centre sorkari January 1, 2023 nungi NFSA beneficiaries nem ration angati agütsür.

December 2023 tashi jangotsü angati agütsütsü aser iba atema sorkar senpong nungi Rs 2 lakh crore endoktsü.

Union Cabinet-i December 23, 2022 tashi küm ka atema NFSA beneficiaries nem ration angati agütsütsü mulunga agizük.

Iba lemtet ajanga NFSA beneficiaries crore 81.35 tema ajangzüktsü. Taoba mapang NFSA kübok beneficiaries nem jenjang dalangba agi rice aser wheat agüja aru.

April 2020 nungi Pradhan Mantri Garib Kalyan Anna Yojana (PMGKAY) ta ser scheme ka kübok jangotsü agüja aruba NFSA quota kübok adentsü.

Nagaland nung Congress-i election nung tokteptsü renema lir



All India Congress Committee (AICC) teshimtet teloki NPCC lennirtem den ajurutepba angur.

Dimapur, January 11, 2023 (TYO): Nagaland nung elections agitsü sangdongra Congress renema lir aser BJP-i regional party tem den lokteper küm 20 tashi sorkar tim mesüi yimsü süa aruba atsüngdoktsü.

MP aser Nagaland, Meghalaya aser Tripura atema AICC Senior Observer Mukul Wasnik-i AICC teshimtet telok kati Bodbarne NPCC lennirtem den ajurutepa senden ka menogo.

Iba senden nung NPCC president K. Therie aser Working President Bobby Panicker na aden.

AICC teshimtet telok nung AICC Screening Committee Chairman for Nagaland Mohan Prakash, MP & AICC Observer Francisco Sardinha, MP & AICC Observer Dr. K. Jayakumar, Member, AICC Screening Committee Sanjay Dutt aser AICC Secretary I/C Nagaland &

Sikkim Ranajit Mukherjee nunger dena lir.

Parnoki Nagaland nung elections agitsü mesüra President's Rule benoktsü indang onüktem lemsatet aser Nagaland nung alirtemia election atema tangatetba metetpela.

"Nagaland nung nübortemi election agitsü tejangraba mali. Nübortemi yimten latetdaksünür saka BJP aser NDPP teloktemi nübor taginüba anema election agira state Congress-i parnok den raratsü renema lir" ta Therie-i ashi.

"February 15, 2023 nungi CBSC exam routine tenzükur anungji election agitsü sangdongra Election Commission-i iba anogo matongdang election maparen renemtsüla aser ibaji anogo 35 shi dang lir. Anungji elections agira mesüra President's Rule benok nunga Congress-i renema lir" ta paisa metetdaksü.

"NPCC lennirtemisa Secular Front indang jembi aser elections agitsü sangdongra kasa tangatetba aliba party tem den lokteptsü merangtsü mesüra Congress-i assembly constituency 60 prong nung tokteptsü" ta Therie-isa ashi.

Nagaland nung elections agitsü sangdongra AICC-i state Congress nungitsü. BJP-i regional party tem den lokteper küm 20 tashi sorkar tim mesüi yimsü süa aruba atsüngdoktsü atema yariteptsü, ta AICC teshimtet teloki nangzük.

Iba senden nungsa Nagaland assembly elections agira AICC President Mallikarjun Kharge, Rahul Gandhi, AICC General Secretary Priyanka Gandhi aser MP Shashi Tharoor nunger star campaigners asütsü atema tebilemba lemsatet, ta Communications Department, NPCC-i sangdong ka nung metetdaksü.

Nagaland Police Control Room ka tentetogo: DGP

Dimapur, January 11, 2023 (TYO): Nagaland adena orr alirtem yaritsü atema Nagaland Police-i Police Control Room ka tentetogo.

Iba osang ya tawa Nagaland nung Director General of Police (DGP) inyaktsü shimba Rupin Sharma, IPS ajanga metetdaksü.

Nagaland nungi tangalen mapa inyaktsü aoertemia parnok mapa inyakdaksürtem kuli jangjatsü atema Police Control Room den tongteptsü akok, ta Rupin Sharma-i sangdong nung shia lir.

Iba Control Room nung text mode agi osang agitepba tajungba asütsü ta paisa ashi.

POLICE CONTROL ROOM:

Mobile No/WhatsApp

No - 08794833041

Email -

sprckohima@gmail.com

Facebook - www.facebook/

NagalandPolice

Twitter - @DGP_Nagaland

Naga yimten latettsüba ya India sorkar ket nung dang lir: NTC

Dimapur, January 11, 2023 (TYO): Nagaland Tribes Council (NTC)-i India sorkar dang Naga yimten latettsü nenshia metetdaksüoggo.

India sorkari NSCN (IM) aser Working Committee (WC), 7 NNPGs den October 31, 2019 nü yimten olemtep tembanger küm asem süia aruaka tanü tashi Naga yimten melateter ta NTC-i ashi.

India Prime Minister-i December 1, 2015 nü Kohima nung ita 18 tsüingda Naga yimten latettsü ashi aser Nagaland Legislative 2018 indang General Election nunga National General Secretary, BJP aser North Eastern States In-charge Ram Madhav-i 'yimten latettsü atema election' yimyim ayimoktsü ta

Media Cell, NTC-i ashi.

Maneni, Parliamentary Standing Committee on Home Affairs, GoI-ia July 2018 nung Rajya Sabha aser Lok Sabha nung Centre dang Naga yimjung olemtep tekaratiba nung tembangtsü shia liasü, ta NTC-isa ashi.

"Ano, Nagaland nunga MLA 59 den MP 2 dena Parliamentary Committee on Naga Political Issue (PCCoNPI) tentet aser parnoki tiyongtsü nung yariteptsü aser Naga yimten latetra menden toktsütsü bangjemtepa lir. Anungji Naga nungeri mapang talangka aginüba ama Nagaland Legislative Assembly 2023 matongdang Naga yimten latettsüba ya India sorkar ket nung dang lir. Tang ya India

sorkari Nagaland nung alirtemi mulung alemtsüsa aser mendaka inyaker ta ashitsüsa tendangba mapang ka lir" ta Media Cell sangdong nungsa ashi.

"Anungji India Prime Minister lenisüba nung tamang kaa aser pai Naga yimten latettsü mendaka inyakba ajiteta NTC-i Nagaland Legislative Assembly 2023 indang General Election matongdang Naga yimten latettsü ayongzüker, ta parnokisa metetdaksü.

Iba ajanga Nagaland nung alirtem aser India sorkar tsüingda tesentaktep akangshitsü aser North Eastern Region nung teti atema yimjung bener arutsü lenmang lapoktsü" ta Nagaland Tribes Council (NTC)-isa metetdaksü.

Chumoukedima District Goanboras Association office semzüksüogö



Chumoukedima District Goanboras Association office semzüksüba sentong nung plaque sayaba mapang Kitoho S Rotokha aser pa kinungtsü na tangokba noksa nung angur.

Dimapur, Aenjeti/January 11 (TYO): Mapang talang ka nungi nungdaka aliba Chumoukedima District Goanboras Association (CDGBA) office Bodhbarnü JD(U) Nagaland secretary general Kitoho S Rotokha-i semzüksüogö. Iba office ya Chumoukedima DC office anasa amenoka lir.

Office lapokba sentong nung o jembiba mapang Rotokha shiba social activist ka lir pai, GB tem ya sorkar tenzüngtem lir aser parnok ya yimtsüngtem aser sorkar tsüngda apulatsürtem lir ta ashi. Paisa, GB tem dang yimden yimsüsüba ajanga tajangzük magitsü ayongzük, kechiyong parnok ya sobaliba temzüng ozüng wazüka aser kümzüka ayurtem lir ta ashi.

Temelenshi bener arutsü atema mapang tongogo ta ashiba den pai asen maitsü aser tera mamatoktsü ajungshi. Sen tashi

aser nübürtemi nongshiba ajanga Naga nungler lokti tesülei atsüngzüka luogo. Tanü asen lokti tejakleni maer kechiyong asenok yongtsü nung telem dang adoker lir, ta pai ashi. Pai GB tem dang kin balala nungi süaka longjemer inyaktü aser asen lokti nung ochi mashi inyakyim balala pokteter aliba aziöktsü atema parnok tejak dang ser lokti anitsü ayongzük.

Maneni pai "goanbora" ta asüba ojang, koba British nungertemi agütsüba Assamese nungler oshi lir, iba ya melentsü shidanga liasü. GB temi abenba aser asema sü temerem aser coat temerem ya memelenshitsu saka iba ya Naga nungler sobaliba design ka agi melen nung ajungtsü aser tali mera taketba angutsü ta pai ashi.

Maneni pai, election agütsüba mapang agi bener arutsüra pa

Ghaspani -II assembly constituency nung JD(U) nungi tokteptsü ta ashi.

Deputy Commissioner, Chumoukedima-i yimtsüng mesüra tzükong candidate sangdongba nungi pila alitsü metetdaksüba koba ADC Chumoukedima, Dr.Kuzonyi Wideo-i nenshia metetdaksüogö, iba dak sendakba nung pai GB tem dang district administration den teka amteper inyaktü mepeshi.

Kasa mapang nung CDGBA tir Rokovitsö Kuotsu-i, Chumoukedima district kümteja parnok association tentettsü atema lenmang lapoktsüba asoshi state sorkar dang kanga pelaba lemsatep. Paisa, association office tembanga yangluba nung teyari tulu agütsüba atema Kitoho S Rotokha dang kanga pelaba lemsatep.

Kohima nung gari senzügenpongtsü tetuyuba agütsü

Dimapur, Aenjeti/January 11 (TYO): Blueband FMSCI Indian National Rally Championship 2022 Round 4buba Nagaland nung Kohima district kübok January 13 aser 14 nü agütsü aliba dak sendakba nung gari senzügenpongtsü atema tetuyuba kar agütsüogö.

1. January 13, 2023 nü

anepdang 06:00 ako nungi nikongtsütsü 04:00 ako tashi Jotsoma nungi Khonoma-i aoba lenmang nung gari senzügenpong mesüdaksütsü.

2. January 14, 2023 nü anepdang 06:00 ako nungi nikongtsütsü 04:00 ako tashi T Khel Model Village (bye pass road) nungi IG Stadium-i aoba lenmang nung gari

senzügenpong mesüdaksütsü.

Tenokdangba agütsür aliba mapang Khonoma yimtsüngi aotsü asoshi Khonoma - Mezoma - Dzudza bridge lenmang amshitetsü.

Iba rally takok nung agitetsü atema timtem arema ajaki teka amteper inyaktü asoshi PRO, DEF Kohima sangdong ka ajanga metetdaksüogö.

Medziphema nung Gorkha community hall semzükogö



Advisor Sericulture, Excise & Minority Affairs, Nagaland, Zhaleo Rio, IAS (Retd.), den Gorkha nungler lenirtem aser tanga lenirtem Medziphema nung Gorkha Community Hall semzükba sentong nung tangokba noksa nung angur.

Dimapur, Aenjeti/January 11 (TYO): Medziphema jila nung Gorkha nungertem indang community hall ka January 11 nü MLA & Advisor, Sericulture, Excise & Minority Affairs Zhaleo Rio, IAS (Retd.)-i semzüksüogö.

Hall semzüksüba sentong nung o jembiba mapang, Gorkha nungertem atema hall ka yanglutsü asoshi lokti-i bendanga agüja meranga inyakba aser lenirtemi jenjang talila agia inyakba atema parnok nem tenüngsang agütsü. Gorkha nungertem parnok meyong hall ka atema küm aika ataogo, ta shia Rio-i, kodanga meyanglutetba dang nungibo

menokbaji tajungba ta ashiba den parnok atema lenla balala nung amshitetsüsa ki tajung ka yanglutsü atema contractor Gohu Angami nem tenüngsang agütsü.

Rio-i, iba ki ya tanga ki mesüra loktitem nema amshitsu asoshi maongka agütsü nung ajungtsü ta ashi. Paisa, iba hall ya Minority Affairs tawabangba kübok senotsü agi kanga petdaka yangluogo, ta metetdaksü.

"Rongsen meimba ya temenen ajak tera" ta shia pai sentepa aliba lokti dang constituency terenlok asoshi parnok nükjidong nungi masetshitsu aser kümküma alitsü ayongzük. Paisa, "asen

constituency küm aika terenlok makai aruogo aser tang temelenshi bener arutsü mapang tongogo," ta ashi.

Maneni Rio-isa, sempet agütsüba sobaliba ya intoktsü nungdaker, kong alakteta jaoker aser tanga tongtibang nisungtem nem sempet agütsüba nung rongsen aika intoker, ta ashi.

Community hall semzükba sentong ya GYASU Medziphema tir Sanjay K. Dutraj lenisüba nung agi aser Nagaland Gorkha Association tir Nobin Pradhan tetushi tejaoker liasü. Kasa mapang nung NBC Medziphema Town Pastor Suraj Dutraj-i iba ki meshiteta sarasadema liasü.

Dimapur DC office nung training agi

Dimapur, Aenjeti/January 11 (TYO): Taruba election atema Election Expenditure Monitoring training sentong ka Dimapur DC office nung agiogo.

Training sentong nung DC aser DEO Dimapur, Sachin Jaiswal, IAS-i tangazükba balala agüja liasü. Training nung pai ARO aser EEM tem dang RO tem den kanga junga sendaktepa

inyaksangshitsu ajungshi, kechiyong parnok anogoshi osang agütsütsü, ta ashi. Paisa, taruba election atema EEM team züngsemtem ajaki kati ka den angatettepa nendaka inyaktü ayongzükba liasü.

Training nung ACST, Taxes Department, Dimapur Tokatoli Sohe-i presentation ka agüja liasü.

CMHIS enrolment camp indang metetdaksü

Dimapur, Aenjeti/January 11 (TYO): AB PM-JAY CMHIS kübok CMHIS atema registration aser card generation dak sendakba nung sorkari tetuyuba balala agütsüogö, ajisüaka camp kar nung Pensioner aser ration card bena malirtem meyipa yokba osang angazükogö. Osang ajangsa camp kar nung tenüng züngoksemtsü atema sen 20 agütsü latetja aliba dak nung tali agiba angazükogö. Taa agiba ya camp administrative officers temi meteta agir asü masü aji mejangja, saka SPOC tem dang CMHIS agütsü atema tetuyuba sülen anidaksü asoshi jenjang tapet agütsü metetdaksüogö.

Enrolment camp tem ayongzükba agiba mapang ketdangsurtem ajaki anidaksü atema tetuyuba kar yamai agütsüogö:

1. Chief Minister Health Insurance Scheme (CMHIS) ya state indang Indigenous Inhabitants/ Permanent Residents tem atema dang lir. Iba dak ajemdaker Indigenous Inhabitant aser Ration card bena alirtem nem dang CMHIS card agütsütsü.
2. Ration card bena alirtem densema Chief Minister Health Insurance Scheme (CMHIS) nung züngoksemtsü atema temsüa alirtem nem enrolment camp tem nung registration/card issuance atema teyari agütsütsü.
3. Yimdak yimtsüngtem nung enrolment camp agiba mapang CMHIS (GEN) nung züngoksemtsü atema disrict aser yimtsüng nung alirtem asoshi PRC/IIC menügdaker. Kibong nung tekolak aser züngsemtem ajak household verification format nung village council chairman-i certify sütsütsü aser applicant tem physical verification agiba sülen iba ya camp nung densema aliba administrative officer-i attest sütsütsü.
4. Iba ya operator temi upload sütsütsü aser idangjisa agizüktsü.
5. Card generation atema dependent ajak atema eKYC nungdaksü, koba parnok indang aadhar linked phone number dangi OTP yokba mesüra biometric authentication ajanga generate asütsü.
6. Ajsüaka iba inyakyim ya authorized Camp Mode operator temi dang inyaktetsü aser Camp Mode logins ya enrolment camp mapang amshitsu, kong physical verification aser household details nung sign asütsü atema administrative officer ka densema alitsü.
7. Jila balala nung enrolment camp tem nung CMHIS (GEN) nung tenüng züngoksemtsü atema kibong nung tekolakba indang PRC/IIC nungdaksü. 2016 küm sülen agütsüba Indigenous inhabitant Certificate aser Permanent Resident Certificate nung nisungba indang noksa aser issuing authority tenüng aser sign alitsü nungdaker. 2016 masüdag agütsüba Certificate tem nung item data tem keta lira verifying authorities-i agizüktsü akok. Sign masü tsüngda item kuli kakettem agi camp nung aliba administrative officer temulung asütsüla.
8. Kibong nung tanga züngsemtem indang PRC/IIC menügdaker. Ajsüaka tesendaktep aliba indang kuli tejangja agütsüba sülenang dependent ajak bendenloktetsü.
9. Iba amala application ya upload asüba sülen idangjisa agizüktsü.
10. Ration card nung kinungertem indang osang tejangja agüja aliba dak ajemdaker card generation atema dependent ajak indang eKYC nungdaksü.
11. Ration card bena alirtem register asütsü nungdak mali. Parnok aadhar linked phone number ajanga OTP mesüra biometric authentication ajanga card agizüktsü asoshi indang indanga otettsü.
12. Camp tem nung CMHIS household ka züngoksemtsü atema sen 20 dang agütsü. Card generation/issuing ya angati asütsü, kechiyong Zephyr Operator tem nem NHA-i card agütsüba shi atema sen 25 agütsür.
13. Kiosk ID: operator ajaki camp mode log ins/Kiosk ID amshitsüla, ajita asünungdang registration agibattem ya district dashboards tem nung shidak adoktsü, koba District Deputy Commissioner aser State Health Authority-i asadanger.



January 11, 2023 nü Air House, New Delhi nung Chief of the Air Staff Air Chief Marshal VR Chaudhari-i NCC tem den jembidang tangokba noksa nung angur.

India nunger aikati senso toktsür tangaleni aoer: Congress

New Delhi, January 11 (Agencies): India nunger aikati senso toktsüba atema Centre sorkar aija Congress-i Ato kilonser Narendra Modi dang, India nunger aikati 'tajung anogotem' bushia linük toktsüba dak sendakba onük nai jembitsü asü?, ta asüngdang.

Congress party otongdar, Gourav Vallabh-i, Ministry of External Affairs indang data ajanga ashiba agi, 2022 küm January nungi October ita tashi nung India nunger 1,83,741-i linük senso toktsüogo; iba tetezü anogo shia India nunger 604-i linük toktsür aoer, ta ashi.

2014 küm den medemdangra iba ya 1.7 agi teimba lir, kechiyong 2014 küm anogo shia India nunger 354-i senso tokja liasü, ta pai ashi.

India nungeri senso toktsüba ya kuli trok ajanga lir, aser itemji mapa manguba tebilemstü, demonetisation ajanga maongka ajema akümba, Goods and Services Tax (GST) junga mebenokba, ayaba, tetsür-tebur tebandang aser press freedom

nung linük jenjang mejungi akümba aser alima nung sensaker teimtiba aliba linük akümba ajanga lir, ta pai ashi.

Osangbenertem senden nung jembidang Vallabh-i, India toktsür aoer teimbaka high networth individuals (HNIs) lir, ta shia Ato kilonseri 'Mann ki Baat' sentong nung jembidang India nunger aikati linük toktsür aoba dak sendakba onüktem jembitsü asü?, ta asüngdang.

2022 küm linük senso toktsürtem rongnungi nisung 7,000 shibo küm ka nung income ji sen crore 8 dang nungi teimba lir, ta pai ashi.

"Kechiba anogo shia nisung 600 dak temai India senso toktsür aser kechiba linük toktsür aoer India nungertem 1.7 agi teimba aküm?" ta pai asüngdang.

Congress leniri, "Amongnü pai 'Mann ki Baat' programme nung jembidang iba onük jembitsü asü, aser kechiba India nung alir India nunger atema 'tajung anogotem' marur,? ta asüngdang.

Joko India nungertemi linük nung masü saka bendanglen ang invest asü tenzüko, kechiba India nunger atema 'tajung anogotemji' bendanglen ang arur, ta pai asüngdang.

2014 küm Lok Sabha election atema nüboyimba mapang nung Narendra Modi-i India nungertem dang 'tajung anogotem' arutsü, ta nangzüka liasü, aser iba dak sendakba nung mapang shia Congress-i sorkar aitsür.

CMIE data nung ajemdaker pai, 2022 küm ita 12 nungi ita 9 nungbo mapa manguba level ji shilem 7 dang nungi teimba liasü aser December ita nungbo shilem 8.3 liasü, ta ashi.

Paisa, alima nung linük 121 nungi global hunger index nung India nunger jenjang 107 buba nung ang lir, global gender gap index nung jenjang 135buba nung lir aser global press freedom index nung jenjang 146buba nung ang lir; item kuli ajanga India nunger aikati linük senso toktsür bendangleni oa alir, ta metetdaksü.

J&K kübok Kupwara nung sepai asem gari lendong nung asü

New Delhi, January 11 (Agencies): Bodhbar anepdang Jammu & Kashmir nung Kupwara kübok Machhal sector nung gari lendong ka nung junior commissioned officer (JCO) ka aser Army ana asü; iba tesemji Srinagar nungi kilometer 100 shi pilar lir, ta army-i metetdaksü.

January 10 nikongdang 5:30 ako meta Machhal sector nung

operational task tenzüka liasü aser forward post-i aoba mapang nung gari lenmang ilaba aser rürjep alaba ajanga gari ajuchir lungreni aluba lendong nung JCO ka den army Jawaan ana asü, ta parnoki metetdaksü.

Army temji Nb Sub Parshotam Kumar, Hav Amrik Singh aser Amit Sharma nunger liasü ta jangjaogo.

Arrshi küm 43 Kumar ya J&K kübok Bishnah district nungi lir; pai kinüngtsü den tanur ana toktsür asü.

Arrshi küm 39 Singh ya Himachal Pradesh kübok Una district nungi lir; pai kinüngtsü den jabaso ka toktsür asü. Sharma ya Himachal Pradesh kübok Hamirpur district nungi lir aser Pai tetsü toktsür alima nungi pilaogo.



Kiralongrartemi Jammu & Kashmir kübok Rajouri amakba aser mapang shia timtem agütsüba sülen ketdangsertemi taoba mapang sepaitem aser tang Dhangri yimdak village defence guards (VDGs) inyakeritem nem self-loading rifles (SLRs) agütsüba sülen tangokba noksa nung angur.

TEMELENSHIBA KA YAMAI SANGDONGER

Dimapur Changtongya Fellowship ajanga ayongzüka 14th January Prayer and Fasting tesentepdak DABA Town Fellowship Khermahal ta 2023 Fellowship Sentep Calender nung agüja aliba tesemji koda masüba Arogo sentong kar ajanga melenshitsu akümer. Anungji kasa programji Ao Christian Revival Church Dimapur Kuda Village (Near DABA Yinsem Fellowship) nung akatsü. Sentong nung aliba ama mapang nung temelenshiba mali 7:00 - 10:00 AM. Anungji sensosanger ajaki yimlibilema iba temelenshiba tesemi mamai arua shilem agitsü asoshi sangdonger.

Sd/- Fellowship Incharge.

Nisung tepsettsü merangba ken o nung MP, Mohammed aitsüogo

Kavaratti, January 11 (Agencies): Bodhbarnü Lakshadweep nung aliba court kati nisung tepsettsü merangba ken o nung NCP nungi Lakshadweep MP, Mohammed Faizal densema nisung pezü aija küm 10 tepuokdak ayutsü obendang agütsü.

Tanüngba nisung asemji Faizal'er adianu ana aser ka tangar.

Kavaratti nung District & Sessions Court-isa iba ken o nung aitsür nisung shia dang senchi sen lakh kaka achi.

Nisung tepsettsü merangba atema 2009 küm parnok anema ken o benoka liasü.

Obendangertemi ashiba agi, 2009 küm Lok Sabha election mapang yimtenren ken o ka nung tiyongtsüi aitba agi MP Mohammed Faizal den tangartemi taoba mapang Union Minister P M Sayeed'er jala kinüngbu aser Congress lenir, Padanath Salih tepsettsü meranga liasü.


Osangbener den jembidang Faizal-ibo, iba ya yimtenren tsütsü benokba ken o ka lir, anungji pai temaba court ka nung ken o benoktsü, ta metetdaksü.

Faizal ya tang Lok Sabha züngsem lir, aser pai iba obendang anema ken o benoka Kerala High Court-i relief magütsüra pa ano küm 2 tali tepuokdak ayutsü. Iba dak alia teti atema yimtenren nung pa jenjang kanga mejungi akümtsü.

1967 nungi 2004 küm tashi Lakshadweep ya Congress tesem liasü aser taoba mapang Union Minister PM Sayeed kümsük 10 tashi iba menden nungi Lok Sabha MP liasü.

2009 küm elections nung par jabaso, Hamdulla Sayeed-i iba menden nungi takok angu aser 2014 küm election nung Faisal-i otsü tasen yanglua vote tali 2,198 agi Hamdulla madak takok ngua liasü. 2019 küm election nunga Faisal-isa takok angu.

PM Modi-i Israel Ato kilonser, Benjamin Netanyahu den jemb



New Delhi, January 11 (Agencies): Bodhbarnü Ato kilonser, Narendra Modi-i phone ajanga Israel Ato kilonser, Benjamin Netanyahu den jemb aser lenir anapronglai lenla aika nung linük ana tsüngda amalitepa asalentong yanglua inyakba tashi itshitsü atema bangjemogo, ta ketdangsertem osang ka ajanga metetdaksü.

Hopta ana tejaklen Netanyahu-i tang agi kümsük trokbenbuba Ato kilonser inyaksü atema tenangzüka agiba sülenbo tang mezüng Modi aser Netanyahu na jemb.

Ato kilonser Modi-i twitter ajanga, "Kü tembar tajung @netanyahu den jangratema jembigo. Election nung takok tulu anguba aser tang agi trokbenbuba Ato kilonser

akümba atema ni pa nem tenüngsang agütsüogo. India aser Israel tsüngda Strategic Partnership ano tajungba akümtsü atema maongka anguba asoshi pelar," ta lemsatep.

Tena phone ajanga jembidang Modi-i Netanyahu dang tekaraba nung India semdangtsü mepishia jaokogo, ta Prime Minister's Office sangdong ajanga metetdaksü.

"Ato kilonseri Netanyahu-i election nung takok ngua tang agi trokbenbuba Israel Ato kilonser inyaksü atema tenangzüka agiba asoshi tenüngsang agütsü aser kümsük takok ngua inyaksü lemsatepogo," ta PMO sangdong ajanga metetdaksü.

Tesüiba küm ishika tsüngda India aser Israel na asalentong partnership kanga kera renlokba atema lenir anati melung asüba lemsatep aser maneni amalitepa inyakba jenjang tashi itshitsü atema bangjemogo, ta PMO-i metetdaksü.

Tesüiba küm ishika tsüngda India aser Israel na defence, aluyimba aser tzü densema sector aika nung kanga terenlok kaogo.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 12, 2023

Asenok mapa ana dang !

Naga nungertemi kanga sapua raktepa inyakba mapa ana lir, aji ka government service aser kaji politics. Atangji, anapronglaji mapasa aser jangratema inyaksüba mapa lir. Ajisüaka, asenok kar dak alaka teimbaka government mapa inyakbaji nübortem nungdak inyaksütsü tebilemba nung masü saka ita sen chia tebok mesütsü atema inyaker, anungji jangramatem. Ano, politics nung shilem agirtema, iba mapa nung yabo kar dang masü saka ajunga amai, yimten tashi amshia pei lima yanglutsü aser nübortem yaritsü asoshi masü saka pei bok mesütsü asoshi bilema dang politics nung shilem agirtema lir. Ashi, government mapa nung inyaker tema ita senbo angutsüba saka ita sen kisung atema inyaker amato masü saka nübortem yaritsü inyaker amato bilema inyak nungbo, government mapa inyakbaji arogo nung toklang mapa inyaker tem dang nungi taoba asütsü. Aji oda, kodang asenoki nübortem nungdak repringteta aser angateta tenzükdir, mapa inyakba agi ita sen agizüksüa amadoktsü. Nübor tenzükba mapa nung jangratemtsüji aji lir. Kasaji yimten nunga election nung toktepertem aser party balala nung inyaker tema politics nung shilem agibaji pei bok asungtsü aser pei akatsü bilema masü saka nübortem bok mesütsü aser nübortem takar kümdaktsütsü kodang bilema inyakdir, tebelema memetet inyaksü aser shisabolutsü melen pelashishia alitsü. Aji oda, kodang yimten lenirtemi nübortem kadaktsütsü aser anisungzükdaktsütsü bilema inyakdir, pei-ang takarba kümer alitsü, kechiyong shibai tangar takar kümdaktsür pa mesüra lajia takar akümtsü. Iba tangatetba nung asenok government tenzükba aser politics nung shilem aginungbo election-a tesünep nung agitsü. Ajisüaka, asen lima nung asenok inyaksüba mapatem ya government service o politics na dang masü, ibajibo nisung ishika agi perir. Aji oda, asenok teimbaka asoshibo peisasa apiteta aser repringteta inyaksüba mapatem inyaker meinyakma lir. Atangji, nübortem asoshi government nungdaker, anungji government mapaji kar nem inyakdaksüdi. Ano külen, government bener aotsü atema yimsüsürtem nungdaker, anungji nübortem tenzüktsü asoshi shirnoki politics jangrar, parnok election-i iang, toktepang aser vote agütsü nü nübortema pei mapai moi, anogo kabo pei lima aser yimten asoshi timtem arema tarensena nokdaker pei vote agüjang. Aji oda, yimten nung shilem aginer aser yimten tashi amshia pei lima renloktsü atema inyaksü shisatsü aser temetetba alirtem asoshibo politics ya jangratemtsüka lir, anungji raratepa aser tsübuseta masü, jangratema yimten onük jembia toktepang, iba jagi election ajanga nübortem nema tangatetba agüja shisatenük lapoktsütsü. Item kar dakji alaka, tanungba nübortembo election mapang vote agütsüba anogo nunga pei mapa nung mazungba agi anarongdena pei vote agütsür ano pei mapa nunga khenbo nokdaktsüsa asenok taküm nung pei akok mapa inyaka alitsüla. Aji oda, teinyakner metenbo, asenokbo alibo peria lirji farm nung, dokan nung, factory nung ta mapaji zünger mezungma aser inyaker meinyakma lir. Aiben asenoki factory mesüra industry ta asüdang machine tulu sen aika agi alia tenzüksü amai bilemer, saka motor tilaka longdaktsütetsüsa asenok, talisa lanurtem, dak tokolok shisatsü aser temetetba lira, iba nung jagi industry tenzüktsü. Tanü alima nung industry tulutema yamaji dang asenok ama nisungtemi tilaka nungi tenzük. Aji oda, aseni jangraba aser aseni nungdaka ta repringtetba mapa ka tenzüktsü atema government daksa imlara kodanga mataloktsü . Ajisüaka, asenokbo government-ang asen dak metaloktsüsa asenoki inyaksüla. Joko, licence aser subsidy putu to süiogo. Iba putu yabo, tzü mopong dang memenentsüsa süra shinga danga temelaba magii pei mulungba mapa tenzükba inyaksüba putu lir. Idangji asenokbo kecha meinyak politics dak jembia kidang amongtsü na ? Aser government service rakteptsü asoshi dang tanurtem nema shisa enoktsütsü na ? Aji oda, peisasa inyaktetba mapa nung takok angurtembo mangu yutsür, government mapa angurtem dang sangjen sanga alitsü na ?

OLEMSABANG

OCHI

~ Mr. Tsükjem Jamir, Lidenpang Sector, Mokokchung

Anung küpok meimchir shia pei-i külemba Tsüngremtem ka ka lir ser iba yimsü ajak jagi temeim aser ochi indang tesayuba angutsü akok. Khristantemi amangba Yisu alimai arubaji temeim aser ochi bener aru. Pa aruba manifestoji Luk4:18-19 nung shia lir, Pai temeim agi sensaker dang osangtajung sayutsüngi, pouka alirtem dang techiokba sangoktsütsü, ajemrepba nisung nüji kümdaktsütsü." Süra asen Naga nungera ochiji kong ali, temeim kong ali? Ano A.Shin 14:34 nung ashir, "Temeshibai kin ka ajungkettsür, saka kechi kin südir süaka temenenji tatsüka lir." Süra asen Naga nungger maksü ya repringang, North East nung Yisu amanger temeja aliba stateji Nagaland lir saka Nagaland ya ochi mashiba rongnung No.1 süra Yisu tesayuba nung tentetba Arogo aser tzüsenba züngsem tajung kati office nung sen crorersa crore aouyartemji kechiba Arogo nungi meintoker? Aor sobaliba nung aour aser ashi kelaker dang senchi achir südito? Süra taoba küm clean election indang ajanga ajanga jembia saka tejembirtemi anir raksameso, shirnoki raksa ar yimeri nisung tenüng meteta lir. Saka itemjibo meshili. Aji ashi nung kü dang ak chidi ta aposotsü, kechiyong ni sensaker, ni aka farm maka. Anungji clean Electionji tenzükdi ta süra Rioba nungi shir yimdak yimsüsürtem ano temeli yoka chia kibong mesürtem, senyong vote ayokertem, Mungdang lenir, pastor, Deacon, mapangsertem aedr nütsüng nübortem ajaki Nenevi nungger amaji kokua lumir külen MLA temeia nübor dang ne vote ayokba sen yagi ni ner lima develop sütsüdi kü dang sen temeshi ta shiang, aser na (MLAba) sen taruba ajak nai amotena kimong alia ki o jen sütenang.

Ano nüburtemi asen MLAbai Government mapa ya ghari nungi bener arua moapu nung tokzüka yutsür yashia alemer masüji kangabo tenüng masentsüla, olu yima temeli yoka kibong mesürtema, asentzü sena mazüngi inyaka kibong mesüdiba ta ajungshir. MLAtema lokti nung jembia dang nü den toktepsang anema o tamajung jembia nübor mulung mejusatsütsüla. Iba sülen asen lima ya kotak lima ama akümtsü. Idangji kotak yimliji asen lima nung yangertsü aji asünungdang "Nagaland for Christ" ji ataloktsü. Aji mesüra atakatem bendenloka Nagaland for Christ tamshi. Yisuji door mate-a masü romala masü, anungji Nagaland for Christ ya amshidi süra jembiba ama inyakdi arung idangji dang asen lima shi aser tanela anaprong nüji angutsü, ya mezüngbuba asenok teinyaktsü ka lir. Ochiba jembia asenoki asen anema inyaker dang tatokji agütsüdi Yisui ashiba ama neterben tenet tashi lephsia benshidi. Tulus-tilar, takar-sensaker ajak Yirusalem süngkümpong temesübai ai yamaji ajem ki jagi aitsüla asen temeten liaka, aser odila principal Tsüknungbai ashi ama kola ta shidi. Ano kandidatema na tulus kümnüadang ashikülak mapa teinyak ner jamejatema teinyakdaksü. Ano karbo na matoktsü yur metsümonga kar majinüadang na sen crorer indok mesasai iba jagi atakatem arur ta metetdi. Tsükchir dang meimtsüba ya temela masü kanga tako lir, tanü aseni takoksa aremdangji asüng ner semchirtem tashi azükarutsü. Rom 12:20 nung ashir; "Saka ne tsükchir yara, chiyungdakjang; Tzurara jemdakjang, tamajung melen tajungi kokdaktsüdi idangji asen tanela kümzük den asen shi temang aser asen lima aneptsü.

Asen lima dang jungerbo takoksa aremdi. Ner kibong ozü kidong, nenok tesü aru ozü tama aru, onok impur chanu ner tesülen aru ta mejembili, tatishitsü agi ner yashi ang aru ta ka masü saka tanep ang arua mi apua mokozi aponger ta ashiyonga kecha masü ta shidi; ya toktepdang kibong aika sensak tiai yiogo. Repringang tanü alima talisa lanurtemi ochishir aginer, kensa ken mejema tenteper, tenla kidang jembijen jembir saka nubor dak mamaonger. Joko item yima tamajung koba agi asen temang, shisatsü aser tamang lurepa kümdaktsür ajaka indoker temelenshiba nung asenok ochiba nem len anidaktsüdi arung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mumbai nung aliba St. Michael Arogo leper nung Kangki raksatsü



January 07, 2023 nü Mumbai kübok Mahim nung aliba St. Michael Arogo indang leper nung Kangki aika raksatsür aliba noksa nung angur.

Mumbai, January 11, 2023

(Agencies): Taoba Honibarnü (January 07, 2023) Mumbai kübok Mahim nung aliba St. Michael Arogo indang leper nung Kangki aika raksatsüogo; iba tatalokba sülen police-i bushisüngdang tenzükogo.

Iba tatalokba aija Nationalist Congress Party (NCP) otongdar, Clyde Crasto-i Maharashtra chief minister Eknath Shinde, deputy Chief minister Devendra Fadnavis aser Mumbai Police dang iba tatalokba junga bushisüngdangtsü mepishi.

"Iba ya Mumbai nung

tesünep meimer Khristantem jashidaktsütsü atema inyakba ama reprangteter," ta Crasto-i twitter ajanga metetdaksü.

"Mumbai kübok Mahim nung aliba St. Michael Arogo meyong leper aser Kangki raksatsüba osang angashi jashir. Bandra nung aliba St. Peter's Arogo indang land acquisition notice agüja aliba agienba sülen ya atalokba ajanga ratar," ta paisa shisem.

NCP leniri, leper raksatsüba ajanga asür kinüngertem melung yirutsür, aser Kangki raksatsüba ajanga Khristantem melung yirutsür, ta

metetdaksü.

"Aibelenertemji tangsa aputsüla aser temerenshi tulu agütsütsüla," ta pai ashi.

NCP lenir, Vidya Chavan-i, "Kangki aser leper raksatsüba tatalokbaji sashia aitsür aser Shinde-i aniba sorkar dang Mumbai tesem ajaklen Tenla kitem aser Kangkitem kümzuka ayutsü mepishir," ta metetdaksü.

Anogo ishika tejaklen Chhattisgarh nunga Narayanpur district nung Tenla ki ka raksatsüba aser police anema inyakba tatalokba dak sendakba nung nisung trok puogo.

Wara sülen America nunger aikati Tenla kidangi maouer

January 11, 2023: United States nung coronavirus wara mapang lockdown mapang talangka aliba ajanga Arogotem kongshiogo aser tangbo America nunger shilem asemsü nungi shilem katibo Tenla kidangi maouer, ta survey ka ajanga bushitet.

Survey on American Life-i agiba "Faith After the Pandemic: How COVID-19 Changed American Religion," study ajanga bushitetba agi, wara nokdangtsü atema lockdown aliba ajanga America nunger million aika kongshia tangbo Tenla kidangi maouer aika kümogo.

2020 küm mei mapang nung America nunger Tenla kidangi aouer shilem 13 dang liasü, aser

2022 küm tomlen America nunger Tenla kidangi aouer shilem 27 aküm; lockdown meshimeshia agienba sülena Tenla kidangi aouer kanga ajemer, ta iba survey ajanga bushitet.

2022 küm tomlen America nunger shilem 33-i parnokiyimsü dak sendakba sentong kecha nunga maden, ta ashi; wara maliba mapang nungbo yimsü dak sendakba sentong nung kodanga madener shilem 25 dang liasü.

Tenla kidangi maouer teimbaka arrshi küm 50 ser tekübokpurtem lir; college azüngertem lir; parnok aika Hispanic Catholics, Protestant tanak nisungtem aser temesüing mainline Protestant Khristantem lir, ta parnokisa metetdaksü.

"Tenla kidangi aouer kanga ajema akümba kuliji talisa wara mapang Tenla kidangi mapang talangka shibangba ajanga lir," ta kasa survey ajanga bushitet.

Wara mapang nung tain shilem 19-i yimsü maitsü melena liasü.

Yaküm November ita nung Lifeway Research-i phone ajanga Protestant pastor 1,000 survey agiba osang metetdaksa liasü. Iba survey ji September 6 nungi September 30, 2022 tashi agi.

Iba survey ajanga bushitetba agi, Arogotem teimbakati Tenla kidang tekülem sentong agi tenzükogo aser yaküm August ita tashi nung Amongnü anogotem nung Tenla kidangi arur shilem 85 liasü.

Burkina Faso nung Khristan putir ka khaset

January 11, 2023: January 02, 2023 nü Burkina Faso linük nung mejangjaba nisungtemi Khristan putir ka khaset; putir, Jacques Yaro Zerbo ya Burkina Faso kübok Soro yimdak liasü aser pa arrshi küm 67 liasü, ta International Christian Concern (ICC)-i metetdaksü.

ACIAfrica-i ashiba agi, putir khasetertem jagi putir indang gari aser pa meyong osettsüset aika auyar ao.

Jacques Yaro Zerbo ya 1986 küm nungi putir inyakba liasü aser pai youth re-education center ka lapoka lanurtem tenzükoga

aruogo.

2015 küm nungi tenzükoga al-Qaeda aser ISIS den tesendaktep aliba kiralongrartemi Burkina Faso nung timtem kanga agüja arudar. Burkina Faso nung jihad ajanga West Africa kübok Sahel region nung nisung million 2.3 jenshiogo.

Meimchir temeden atema inyakba melungtet telok Release International (RI)-i tawa Persecution Trends 2022 report sangdonga liasü. Iba report ajanga ashiba agi, "Tang Khristantemi Burkina Faso

nung ajangshiba tensaji Nigeria tensa den kasa kümogo."

Nigeria nung Boko Haram aser Islamic State West Africa Province kiralongrartemi Khristan meyirjang aika tepsetogo aser nisung million aika ajenshiogo.

Release International-isa, Burkina Faso nung central sorkar tashimaitba den külemi 2022 küm Frace nunger sepaitem aienshiba ajanga region nung kiralongrartemi ano timtem tuluba agüja tensa tamajungba akümsü, ta metetdaksüogo.

ANOGO ABEN TSÜNGREM DEN

Toktsütsü ama bilem

T.Ken 61: 1-8

Kodang par jabaso Absalomi pa anema apuso Dawidi pa taküm kümzüktsü asoshi Yirusalem nungi jena aotsüsa aküm. Iba nungi angazükba pai iba ken nung zülu. "Ni ayimtenba angang, Oh Tsüngrem, ni sarasademba angang. Kü mulungjang lulaba agi alima tatem nungi ni ne dang aja. Kü dang temaba jenokdak lung jagi ni aniang. Kechiaser ni asoshi tsükchir nungi jenokdak tashi tait mitsaji na lir" (t. 1-3).


Dawidi Tsüngrem teyari aser tashi meshia liasü. Pa lungpok ka nung lia mesüra arem nung miima jenoker aliba mapang iba ken zülur alitsü. Asenoki memetet. Saka pa shidakba lungji Tsüngrem liasü. Pa shidakba Jenokdak aser Tashi Tait Mitsaji Tsüngrem liasü. Asenok kidang nungi pilar liaka asenok shidakba jenokdakji Tsüngrem lir ta metettsübaji junger.

Dawid Tsüngrem süki nung liasü. "Ni Ne süki nung teti lidi; aser Ne tashikang kübok ni jenokdi" (t.4). Koba tetezü "Temeshitiba taktang, kong tezüngzüktepba ozüng Süngden Cherubim tashi kangi amokbangba lir." Asenoki asüngdangtsü akok, "Dawid arem nung dang jenshia ali nung Süki nung koda alitsü? Na jena aor." Pai ashitsü, "Kü Tsüngrem teti kü den lir. Ni Pa dak ali tashi ni Süki nung alir." Dawidi pa tongdangtsü asoshi yimti jaraji menüngdak ta angateta liasü. Tsüngrem pa Lung liasü. Külemtsü asoshi pa süki menüngdak. Tsüngrem pa süki liasü.

Dawid pelaa liasü. "Anungji ni ne nüngsang ken teti atentsü, aser anogo shia kü tenangzükbatem atalokdaksütsü" (t.8). Kodang nai ne temepeshiba Kibuba dangi bener arudir aser pa dak tamang kaa atadir, nai Pa dang pelaba metettsü. "Kechiaser Nai, oh Tsüngrem kü tenangzükba angashiogo... shiri Ne tenüng tsübur, parnok senmang Nai kü nem agütsüogo" (t.5). Tsüngremi Dawid sarasadem langzü. Ne tsüngdang Tsüngremji kechi? Pa ne Lung asü, ne Jenokdak asü, ne Tashi Tai Mitsa asü, ne Sü ki? Tanü ne nüngdak angutsü na Pa dak amanger asü?

Tsüngremi pa tenzükere jendoktsü kodanga bilema mali. Item ochitem bilemtetang. Nai ayimtenba teti pPai angaa lir. Pa teti ne den alitsü aser kodanga na mesentoktsü. Tsüngrem tawabangba kübok na teti pelaa alitsü. Tanü ne tia nung item ochitem amshiang.

Congo nungi jena aouer pastor, Lubunga Lumenge khasetogo



Pastor Lubunga Lumenge

January 11, 2023: Congo linük nung rara aliba ajanga Nashville-i jena arur pastor ka taoba hopta pa kima khasetogo, ta police-i metetdaksü.

Nashville Metro Police Department-i ashiba agi, taoba Brihostibar nep lenmang nung süisüponger kati arrshi küm 30 pastor, Lubunga Lumenge tasüimang angu.

Kiyongertemi ashiba agi, Brihostibar anepdang 4:00 ako meta parnok ijang ola angashia liasü.

Lumenge-i Congo toktsüba

sülen Tanzania nung tesayur inyak. Iba sülen pa US-i arua Swahili Khristantem rongnung züngsem ka aküm.

Arogo nung züngsem Mto Biko-i, "Iba ta taoksatsü osang lir. Ni kanga jashir. Pa ya nisung tajung ka liasü aser Arogopurtem den tesendaktep junga liasü. Pai tangar yiritsü jangra aser tangar khuret mesüra timtem atema tebilemstsü katsüba nisung ka liasü," ta ashi.

Lumenge-i Swahili Khristan telok ana nung aden aser kabo Grace Church of Nazarene lir.

AO OSHI ANGAZÜKDAK: TANÜ ANGAZÜKTSÜBA OJANG



Ongsak

(n) arem nung menaba tashidak (disease caught from forest)
* Arem min nung senzüdang ongsak menar.

Ongsem

(n) süngo tu agi zükjema aliba arem (forest with heavy vegetation)
* Ongsem tulu nung ozüsangnu tapu aika alir.

OLONG PAITEP # 6397

Grid for crossword puzzle #6397 with numbers 1-15 indicating starting positions.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latettsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6396 TELANGZÜBA


TIPIEN :

- 1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jella e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tripura CM Dr Saha-i Oral Cystic Lesion Surgery agi



Agartala, January 11, 2023 (Agencies): Tripura Chief Minister Dr Manik Saha-i Bodbarnü Tripura Medical College nung arishi küm 10 tanur ka dak 'dental surgery' takok ngua agiogo.

Tanep 9:00 ako nung CM Dr Manik Saha-i Hapania nung taoba mapang pa inyakdak Tripura Medical College-i ao. Pai indangindanga Operation Theatre-i ai aser tanur ka dak Oral Cystic Lesion takok ngua surgery asü.

Tanep 9:30 ako meta Dr Saha-i menürema Operation Theatre nungi kimai adok.

Pai Tripura nung Chief Minister inyaktsü tenzüker ita 7 süiogo saka pai pa wadang senzüka meyui inyaker.

"Akshit Ghosh temang junga lir. Mapang talangka lir ni surgery agi saka timtem kecha maliasü" ta Dr Saha-i osangbener dang ashi.

During the surgery, he was assisted by Dr Amit Lal Goswami, Dr Puja Debnath, Dr

Rudra Prasad Chakrabarty of Dental Surgery and the Maxilla Facial Surgery department.

Iba mapang Dr Amit Lal Goswami, Dr Puja Debnath, Dental Surgery & Maxilla Facial Surgery department nungi Dr Rudra Prasad Chakrabarty nunger pa den yaritep.

Iba medical team nung Dr Smita Paul, Dr Kanchan Das, Dr Sharmishtha Banik Sen aser Dr Baishali Saha nungera dena liasü.

Mizoram police & Assam Rifles-i prangpong-injang aika apu

Aizawl, January 11, 2023 (Agencies): Mizoram police aser Assam Rifles külem telok kati Siaha district nung prangpong-injang aika puogo.

Osang tejangja ka angazükba sülen Assam Rifles aser Mizoram police külem telok kati mita aodang prangpong-injangtem ngutet.

"Osang angazükba sülen Tuipang, Zero point aser

Kalchaw nung Siaha police dena mobile vehicle check post (MVCP) ka mendanga ata" ta Assam Rifles-i ashi.

"MVCP ajanga Maruti Swift gari ka sot aser idakji prangpong-injang bena aliba apu" ta parnokisa metetdaksü.

Mizoram kübok Siaha district nung prangpong-injang apuba dak sendakba nung nisung 5 puogo.

Mizoram nung aser talisa Indo-Myanmar arrtsülen prangpong-injang shibelenba ya khuret tulu ka lir, ta AR-isa ashi.

Siaha district nung apubaji 0.32 Pistol ka, 12 Bore Rifle ka, 0.32 ammunition 17 rounds, 12 Bore Rifle Ammunition 14 rounds, Mobile phone 5, Rs 13255 aser Maruti Swift gari (MZ01W1607) ka lir.

Lakhimpur nung 'reserved forest' ali hectare 200 meyipa agiogo



North Lakhimpur, January 11, 2023 (Agencies): Assam nung Lakhimpur district administration-i Pabho reserve forest nung ali atsünga agir ket nungi hectares 200 shi meyipa agiogo.

Tanü agi anogo ananübuba Assam police aser central paramilitary forces lia earthmovers, tractors aser tanga oset 60 shi amshia ali atsünga agiba tesem merüktet.

Bodbarnü Lakhimpur district kübok Mohghuli yimtsüng nung mapa inyak. Tanü Assam sorkari meyipna agiba tesem Pabho nung kiojen 202 shi liasü aser iba nung PMAY houses aser Anganwadi Centres dena liasü. Ajisüaka, sorkari iba osang agütsüba sülen item kiojentem azüngtetadoker liasü.

Timtem kecha melii dang mapa inyakogo. Iba tesem nung alir aikati iba mapa pelashishia agizükogo saka alu arohtsü

mapang magütsüba atema melabela ashi, ta Assam Police-i metetdaksü.

Nowboicha MLA Bharat Chandra Narah-ia iba tesem semdang aser pai ashiba 'eviction drive' ya külen tsütsü dang liasü kechiyong nisungtemi district kettangsurtem nungi osang anguba sülen pei ki toktsür oadoker liasü.

"Iba eviction drive ya alu nung tsünüsensongtsütem raksatsüba dang süigo. Parnoki nübortem nem tsünütsü agitsü aser ango tzübo nungi angotem aputsü mapang peria agütsütsüba asü" ta Narah ta ser opposition Congress party nung züngsem kati osangbener dang ashi.

Taoba nunga Lakhimpur district kettangsurtemi Pabho reserve forest nung ali atsünga agir ket nungi 250 hectares shi meyipa agiogo.

Lakhimpur district nung Pabho reserve forest ya 1941

nung 'reserve forest' ka ta sangdonga liasü.

Pabho reserve forest indang ali tasazükji 4628.88 hectares lir saka Ranganadi ayong aser iba nung yimokba ayongtem nung tzümetsüng ajanga alimang melenshir.

"Iba reserved forest indang ali tasazük 2560.25 hectares nungi 29 hectares dang atsünga magi" ta Assam forest department-i ashir.

Pabho reserve forest atsünga agiba atema nisungtemi Lakhimpur district forest department dak tai tongloktür.

Taoba mapang Assam forest department-i parnok dang sen meshir lidakja aru ta iba tesem nungi meindokertemi ashir.

Lakhimpur district administration aser Assam forest department ajanga iba tesem nungi meindokertem khen atema lidaktsütsü asoshi ali bigha 3 shi agüja lir.

Ethiopia: Tigrayan telungpurtemi hadir bendanga agütsü tenzükogo

Addis Ababa, Aenjeti/ January 11 (Agencies): Ethiopia anütoktiplen mepetmesü tulu adoker aliba tembangdaksütsü atema ita ana tejakdang yimjung asoshi tenangzüktepba ka yanglur aliba nung shilem ka ama Tigrayan telungpurtemi parnok indang prangbong hadir tulutem (heavy weapons) bendang agütsü tenzükogo, ta telungpur otongdar kati ashi.

Agulae jila nung prangbong hadir bendanga agütsüba sentong ya telok anaprongla nungi züngsemtem aser regional body; Intergovernmental Authority on Development (IGAD)-i achaayanga liasü.

November 2 nü yimjung atema tenangzüktepba yangluba nung telungpurtemi prangbong hadirtem bendanga agütsütsüba, Tigray federal authority tanaben amenokshitsüba, iba tesem tesendaktep tanaben lapokshitsüba densema lir, koba 2021 küm tom nungi shibanger liasü.

2020 küm November ita Ato Kilonser Abiy Ahmed-i Tigrayan lenir aputsü atema sepaitem yokba sülen rara tenzük. PM-i pa tashi anema nokdakba aser federal military bases amakba atema Tigrayan lenir ya aija liasü.

"#Pretoria agreement benoktsü atema nangzüktepba nung shilem ka ama Tigray-i prangbong hadir tulutem bendanga agütsüogo," ta Tigray People's Liberation Front otongdar Getachew Reda-i Bodhbarnü tweet ka ajanga

metetdaksü. "Iba jenjang agiba ajanga tenangzüktepba ajunga benoka inyaksangshiba nung teyari tulu agütsütsü imlar," ta paisa ashi.

Prangbong hadir bendanga agütsüba sentong nung Tigray Defence Forces (TDF) representative Mulugeta Gebrechristos-i, linük nung yimjung bener arutsü atema prangbong hadir bendanga agütsüba ajanga shilem tulu agütsü, ta ashi.

"Yimjung nung alitsü süra mangatettep adoktsü atema inyaksangshibatem ajak tembangtsü ta tamang nung onok inyaksangshir. Yimjung ya asenok ajak atema kanga tongtibang," ta Mulugeta-i ashi.

"Asenok ajak Ethiopia nung shilem ka lir. Onok aser TDF naprongla pei talidak nungi yimjung, tangatettep aser temeim nung ainshio," ta Ethiopian army tenüng nung nokdaksang Aleme Tadesse-i ashi.

November ita yangluba tenangzüktepba nung Tigrayan telungpurtemi parnok indang prangbong hadir tulutem bendanga agütsüba inyakyim ya bendanger aser non-federal forces tem atsüingnba kasa mapang nung agitsü ta shia lir.

Kidanger Eritrea-i, iba tesem nung raraba mapang Ethiopia army pusemogo, saka Asmara-i Pretoria sensaksem nung shilem magi.

Ethiopia sorkar delegate tem rongnung Ato Kilonser indang national security adviser Redwan Hussein, minister tem

densema liasü aser parnok December 26 nü Mekelle semdang, koba yimjung inyakyim nung tongtibang jenjang ka liasü.

Iba sülen anogo ishika lir December 29 nü Ethiopian federal police ita 18 sülen mezüngbuba Mekelle-i ia liasü.

Iba rara nung nisung kwi taküm sama iba indang osang tejangja memetet, kechiyong parnok osangbenertem nem temelaba magütsü.

November ita yimjung atema tenangzüktepba yangluba sülen rara anenogo aser telungpurtemi ashiba agi, parnok parnok züngsem shilem 65 raraba tesem nungi aninogo.

Yimjung atema tenantzüktepba yangluba sülen teyari agütsüba maparen tenzükogo, ajisüaka chiyongtsü aser medical teyari agütsüba ya nüngdakba dang nungi kanga agi tajemba lir.

Kasa mapang nung Mekelle ya December 6 nü national power grid nung sendakteptsüogo.

Ethiopia nung bank tongtiba CBE-i December 19 nü sangdong ka ajanga jila kar nungbo parnok inyaksangshi tenzükba metetdaksüogo aser tesem kar nungbo telephone c o m m u n i c a t i o n yanglushitsüogo.

Iba rara ajanga Ethiopia nung million ana dak tema pei talidak ki toktsür jenshia ao aser nisung million 13.4 dak tema humanitarian aid dak metaloker alitsüsa jenjang kati idaktsüogo, ta UN-i ashi.

Zelenskyy-i Medvedchuk ket nungi lisopur jenjang agin

Kyiv, Aenjeti/January 11 (Agencies): Tir Volodymyr Zelenskyy-i yimden yimsüsür pezü ket nungi Ukraine lispor jenjang aginogo, kong Kremlin pusemba yimsüsür Viktor Medvedchuk densema lir, shiba taoba küm tepuokertem melentepba mapang Russia-i ogo.

"Ni Andriy Leonidovych Derkach, Taras Romanovych Kozak, Renat Raveliyovych Kuzmin aser Viktor Volodymyrovych Medvedchuk nung ket nungi lisopur jenjang agintsü atema telemtetba agiogo," ta Zelenskyy-i Mongolbar aonung ashi.

"Nübur tenzükertemi Ukraine nung masa ka Ukraine-i aruba nisung tepsetertem pusemra onokia jenjang tapet agitsü," ta pai ashi. Medvedchuk ya Russia tir Vladimir Putin den kanga junga sendaktepa lir aser pa ya tang tenokdangba agütsür aliba pro-Russian party lenir liasü aser September ita Moscow-i anir mao tsüngda pa linük ashioktsüba atema aija tepuokdak yur liasü.

Pai 2003 küm mezüng Putin

ajuru aser Viktor Yanukovich atema nüboyimba sentong achaayanga liasü, shiba pro-Moscow presidential candidate liasü.

2004 küm Yanukovich-i election akokba sülen Orange Revolution tenzük, koba Ukraine nung mezüngbuba pro-Western revolt liasü. Iba longkak aitba sentong tenzükertemi election inyakyim nung ochi mashi ken o sendaka aliba atema Medvedchuk aitsü.

Viktor Yushchenko-i tanabuba term makokba sülen Medvedchuk khen atema atsüngzüka ao, saka pai media empire ka tenzük, kong television networks asem aser publications aika densema liasü. Russia-i February ita Ukraine amakba mapang pa kecha tetsükdaksü makai jena otetba ya Zelenskyy-i aniba sorkar tashimait ka ama züngshia liasü.

Iba sülen pa April ita Ukraine indang special services-i apu. Pai Russia-i atsünger aliba Crimea tesem nungi alirongsen auyatsü merangba aser Moscow nem Ukraine military indang miim osang agütsüba

atema aija liasü. September ita Ukraine nung sepa 251 melena Russia nem bendanga agütsüba tepuoker 50 dak tema rongnung pa densema liasü.

Kasa mapang nung Kozak aser Kuzmin na ya Medvedchuk'er party züngsem kaka ama Ukraine indang parliament nung shimmer liasü.

United States-i, 2022 küm January ita TV channels asem kibur Kozak nem tenokdangba agütsü. Linük ashioktsüba atema Kyiv-i pa aputsü merangba sülen pai Russia nung idang osang taila prokshiba atema tenokdangba agütsü.

Ukraine-isa, linük ashioktsütsü merangba atema Kuzmin aitsüogo.

Washington-i tenokdangba agütsür aliba Ukraine nung MP Derkach ya US-i December ita tenokdangba agütsür aliba nung aibelenba aser senotsü oshi meshi amshiba atema aitsüogo.

Pa ya 2020 küm US tir election nung minpronga Moscow nem teyari agütsüba atema aija lir.

AOYIM SENSO TELONGJEM

Chumkedima: Nagaland
METETDAKTSÜR

Aoyim nung alirtem aser yimtsüng adena orr aliba züngsemtem dang Aoyim Senso Telongjem Senso senden January 28, 2023 nü 10:00 ako nungi tenzüka Aoyim Village Council Hall nung amentsü ta metetdaksür.

Aoyim Senso Telongjem züngsem ajak dang iba senden nung tamakok maludaktsüi arua adentsü metetdaksür.

Temetetsü kar:

1. Senden metenzük tsüngda tenüng ajatsü
2. Züngsem saru sen 100 (tebur arishi küm 16 temapurtem ajak) aser 2023 küm atema kilen saru senden amenba anogo sarutsü.
3. Senden nung sensak asemtsü atema onük kar danga lira January 28, 2023 nü tashi nungbo Senso ketdangpur ket tongtsütsüla.

Sd/-
Tir

Aoyim Senso Telongjem.

Office of the

Longpa Senso Mungdang

H.Q: Longpa, P.O: Impur
SANGDONGER

Mr. Lipokmeren Jamir, S/o K. Benjungkumba Jamir, Longpa senso tajung ka lia aru, saka pai Yajang senso kümner ta Longpa senso dang asüngdang nung, Longpa senso mungdangi pai asüngdangba ama melar. Anungji tanü nungi pa aser pa nungi jakzükbatem shingaia Longpa senso ta amshitsü memelar ta sangdonger.

Sd/-
Moakumzuk Lemtur
Tir
Longpa Senso Mungdang

Sd/-
Talikumzuk Aier
Tongti Zülur
Longpa Senso Mungdang

Form No. 3

[See Regulation-15 (1)(a)] / 16(3)

DEBTS RECOVERY TRIBUNAL GUWAHATI

Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati - 781007 (Assam)

Case No. OA/397/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 2570

HDFC BANK

VS

MESSERS A AND B ENTERPRISES

To,

(1) MESSERS A AND B ENTERPRISES

A Proprietorship firm Represented by its Proprietor, Mr Kethobo Savi I O C Road NH 29 Minister Hill Kohima Nagaland 797001 Kohima, NAGALAND-797001

(2) MR KETHOBO SAVI

SON OF NOPITSO SAVI RESIDENT OF ZAKHAMA VILLAGE KOHIMA NAGALAND 797001 KOHIMA, NAGALAND-797001

SUMMONS

06/12/2022 nü Hon'ble Presiding Officer/ Registrar matsüngdang OA/397/2022 benokogo.

Act, (OA) section 19(4) dak ajemkdaker nai apuba sen 2137504.47/- (application along with copies of documents etc, annexed) meyipa meshitsü atema Application dak ajemdaker Hon'ble Tribunal-i summons/notice agütsür. Iba Act section 19, sub-section (4) dak ajemdaker defendants tem teküköklen agüja aliba tetuyuba agütsür.

(i) Osang agizükba sülen anogo semer tsüngda temepishiba kechiba magizüktsüla iba indang metetdaksütsüla; (ii) original application serial number 3A kübok applicant-i shisema aliba kiojen aser ali kimong dak alia tanga kiojen aser ali kimong tem indang osang metetdaksütsü; (iii) original application kübok serial number 3A nung shilema aliba kiojen aser ali kimong dak sendakba nung kecha inyaksangshi masütsüla; (iv) Tribunal temelaba magi original application serial number 3A nung shilema aliba kiojen aser ali kimong mesüra security interest create asüba kiojentem kechia mayoktsü mesüra mamshitsüla. (v) iba amala ali kimong aser kiojentem yoka bank nung lapoka aliba account mersüra iba amala kiojen tem atema security interest aliba financial institutions tem nung sen inokra aji nü khuret asütsü. Nü dang written statement file asütsü tetuyuba agütsür aser 23/01/2023 nü 10:30 ako nung Registrar madang nokdaksü tetuyuba agütsür. Tetuyuba sülen manidaktetra na madeni application angadangtsü. Tribunal kü nem tashi agütsüba dak ajemdaker 08/12/2022 iba tetuyuba agütsür.

Sd/- Registrar,

Debts Recovery Tribunal
GUWAHATI



Carmel Valley, California kübok Paso Hondo Road nung Carmel ayong moshia ayimba ajanga garage ka metsünger aliba noksa nung angur. Iba tzümetsüng lendong nung nisung 12 süogo aser yipru ajanga ki aika nung power maka kangshitepdar. Yipur ajanga tzüküm nung lenmangtem metsüngogo, tata garitem meküpdaktsü, süngtongtem tera dena laodaktsü aser tesem kar nungbo anentsüh aluba dena metetdaksüogo. Kasa mapang nung nüburtem teküzükba tesem bushia aninogo.

CM Rio-i INRC 2022 Round 4buba tenzüksütsü

Kohima, Aenjeti/January 11 (TYO): Indian National Rally Championship (INRC) 2022 - Rally of Nagaland Round 4buba nung shilem agitsü atema driver aser co-driver 80 Kohima tonga aruogo. Iba asayamung ya Nagaland sorkar den longjemer Nagaland Adventure Club (NAC)-i ayongzüka January 12 nungi 14 tashi asayatsü.

Federation of Motor Sports Council of India (FMSCI)-i ayongzüka aser Blueband Sports-i promote asüba iba rally nung linük kübok tesem balala nungi driver aser co-driver 80-i shilem agitsü.

Iba Championship ya Kohima kübok km 120 ayimjema lenmang ana nung asayatsü. January 13 nü Jotsoma nungi Dzülekie NEC lenmang nung asayatsü aser January 14 nü IG stadium den

sendaktepba Kohima bye-pass nung asayatsü. Rally ya anepdang 6:00 ako nung tenzüksütsü.

Nagaland Chief Minister Neiphiu Rio-i iba rally ya January 12 nü nikongtsütsü 3:30 ako nung Hockey Ground, Indira Gandhi Stadium Kohima nung tenzüksütsü. Sentong nung NAC convener Peter Rutsa-i lokti pela agizüba o jembitsü aser Blueband Sports chief promoter Premnath Kasinath-i tajungshi o jembitsü.

Iba rally nung shilem agitsü aliba nungtugu driver tem rongnung Gaurav Gill, Karna Kadur, Aditya Thakur, Fabid Ahmer aser Chetan Shivram nung densema lir.

Kasa mapang nung NAC tir Burakum-i ashiba agi, iba rally repringnertemi gari shi sen 2000 agütsür repringtetsü aser

rally repringtsü atema lenmang nung tesem kar dang atakzüka toktsütsü.

Burakum-isa, NAC ya 2010 küm state nung Adventure and Motor Sports ajungkettsü nükjidong nung tenzük ta ashi. Kümtem tsüngda club-i nükjidong ataloktsü atema HorsePower challenge ta nungja agütsür sentong ka kümshia ayongzüka bendanga agüja inyaka arudar, ta paisa ashi.

State nung National rally championship ka ayongzüka asayaba mezüngbuba club küma nükjidong tongtetba atema kanga pelar, ta pai shisem.

Maneni sempet agütsüba sentong ya January 14 nü nikongtsütsü 4:00 ako nung RCEMPA, Jotsoma nung agitsü.

France captain Lloris international football asaya nungi anener

Paris, Aenjeti/January 11 (Agencies): France captain Hugo Lloris-i pa international football asaya nungi anenba sangdongogo. Doha nung World Cup final asaya nung Argentina penalty nung makokba sülen hopta asem lir arishi küm 36 tain asayari iba osang sangdongogo.

"Ni takokba tashi meranga asayaogo ta bilema international asaya nungi anentsü telemtetba agiogo," ta Tottenham Hotspur goalkeeper Lloris-i French sports daily L'Equipe den sensaksemba mapang ashi.

"Euro qualifying tenzüksütsü ita anaser tesadang lir iba osang ya tang sangdongtsü tongtibang ta bilemer," ta pai ashi.

Lloris ya arishi küm 21 asüdag 2008 küm November ita Uruguay den friendly ka asayaba mapang France team nungi mezüng asaya liasü aser World Cup mapang pa France nung asayartem rongnung national team nungi timbaben asayaba asayar akümba sülen international asaya nungi anenogo.

Taoba mapang Lilian Thuram-i (142) France national

team nungi timbaben asayar liasü koba tang Lloris-i (145) pa ajatetogo.

"World Cup tembangba sülen ni asaya nungi anentsü atema bilema aruogo, saka iba masüdag ita trokshi jelia iba ya bilema liasü aser WC mapang tali bilem tenzük aser ibayongi tang asaya nungi anentsü telemtetba agiogo," ta Lloris-i ashi.

Taoba mapang Nice aser Lyon goalkeeper Lloris lenisüba nung France team-i 2018 küm Russia nung World Cup kokogo.

Pai ajak senteper asayamung tongtibang tenet nung shilem agiogo, kong 2016 küm Euro nung Portugal den final asayaba densema lir. Iba asaya ya parnoki mekoki liasü.

World Cup nung France team back-up goalkeeper tem ya arishi küm 37 tain Rennes goalkeeper Steve Mandanda aser West Ham United Alphonse Areola na liasü.

Ajisüaka Lloris ya arishi küm 27 tain AC Milan goalkeeper Mike Maignan-i melentsü, shiba yiruba ajanga World Cup nung masayatetsüsa aküm.

"Atstüingintsü atema mapang ka arur. France national team ya nisung ka meyong masü ta ni shia aruogo," ta Lloris-i ashi.

"Goalkeeper (Maignan) ka renema lir aser ni ozü kibong aser tanurtem atema mapa talila nungdaker.

"France goalkeeper ama küm 14 ser tesadang asayaba ya takok tulu ka lir, saka tekelok shisatsüa kanga belemer aser tang iba telemtetba agiba ajanga küm ishika ano temaba jenjang nung asayatsü atema teyari agütsütsü," ta pai ashi.

Coach Didier Deschamps-i 2026 küm World Cup tashi national team head coach mapa abentsü atema tenangzüktepba ka yangluba sülen Lloris-i iba telemtetba agiogo.

France atema tang tinyaktsüji 2024 küm Germany nung Euro atema qualify asütsü asoshi lir, koba March ita tatemlen tenzüksü. Qualifier nung parnok Group B nung Netherlands, Republic of Ireland, Greece aser Gibraltar den asayatsü. Euro 2024 ya taruba küm June 14 nungi July 14 tashi asayatsü.

India den Test asaya atema Australia team sangdongogo

Aenjeti/January 11, 2023 (Agencies): Imla aliba ama India den February aser March ita Test asaya pezü asayatsü aliba atema Australia-i team nung spinner pezü anisemogo.

Bodhbarnü iba asayamung atema asayartem sangdongoba mapang spinner pezü rongnung Todd Murphy-a züngoksema liasü, shiba linük tenüng nung tang mezüngbuba asayatsü lir. Pa den spinners Nathan Lyon, Ashton Agar aser Mitchell Swepson nung shimogo.

2004 küm sülen tang mezüngbuba India nung asayamung ka akoktsü meranga mapang Australia-i team nung Matthew Renshaw aser Peter Handscomb nata aniokogo, ajisüaka Marcus Harris bo meshim.

Fast bowler tem rongnung captain Pat Cummins, Mitchell Starc, Josh Hazlewood, Scott Boland aser Lance Morris nung densema lir. Australia-i test asaya kar nungbo fast bowler asem tashi anioka asayatsü renemdar.

February 9 nü Nagpur nung asayatsü aliba mezüngbuba Test nung Starc masayatetsü, kechiyong pa temeyong yirur lir aser all-rounder Cameron Green-a yirur lir.

"Onoki condition balala nung atsüshia asayatetsüsa asayartem shimogo," ta chief selector George Bailey-i ashi.

"Todd Murphy kanga kara renlokyonga odar, pai domestic cricket aser tawa Australia A nungi kanga junga asayaogo. Item asayatem dak ajemdaker Todd ya spinner tem rongnung tongtibang ka kümogo," ta Bailey-i shisem.

Australia pur February aser March tsüngda New Delhi, Dharamsala aser Ahmedabad nunga asayatsü. Kasa mapang nung one-day internationals asem asayatsü aliba atema asayartem mapang tatsüka tsüngda nung sangdongtsü.

Australia-i New Delhi nung tanabuba test aser Dharamsala nung tasembuba test masaya tsüngda asayartem melenshitsü akok.

Australia squad: Pat Cummins (captain), Ashton Agar, Scott Boland, Alex Carey, Cameron Green, Josh Hazlewood, Peter Handscomb, Travis Head, Usman Khawaja, Marnus Labuschagne, Nathan Lyon, Lance Morris, Todd Murphy, Matthew Renshaw, Steve Smith, Mitchell Starc, Mitchell Swepson, David Warner.

Malaysia Open: Prannoy tanabuba round-i iogo

Aenjeti/January 11, 2023 (Agencies): Olympics nung medal ana tashi koker aliba India tsürtem rongnung nungtugu asayar PV Sindhu yiruba ajanga mapang talangka masaya lir Malaysia Open nung asaya saka la mezüngbuba round nung tsükogo.

Kasa mapang nung tawa kanga junga asaya aliba India nung asayar HS Prannoy-i Bodhbarnü mezüngbuba round asaya koka Malaysia Open Super 1000 badminton tournament nung tanabuba round tongtetogo.

Sixth seed asayar Sindhu, shiba August ita Commonwealth Games nung gold medal anguba sülen tetsüng yiruba ajanga masayai arur tang mezüngbuba asaya liasü, la Spain tsür Rio Olympics champion Carolina Marin-i 12-21, 21-10, 15-21 agi koka liasü.

Tebur kija asaya nung No. 8 Prannoy-i külem India nung asayar Lakshya Sen 22-24, 21-12, 21-18 agi koka liasü. India nung tebur asayartem rongnung Prannoy ya temaba

jenjang nung lir aser Sen tang 10buba nung lir.

Kerala nungi arishi küm 30 tain asayar ya tanabuba round nung Indonesia nung asayar Chico Aura Dwi Wardoyo den asayatsü.

Kasa asayamung tebur tarep asaya nung Satwiksairaj Rankireddy aser Chirag Shetty nata pre-quarterfinals-i iogo. Tenati Korea nung tarep Choi Sol Gyu aser Kim Won Ho na 21-16, 21-13 agi koka liasü.

World No. 5 tarep ya taruba asaya Indonesia nung tarep Muhammad Shohibul Fikri aser Bagas Maulana na den asayatsü.

Ajisüaka Malvika Bansod-i mezüngbuba round majangteti tsükogo. Bansa ya Korea nung second seed asayar An Se Young-i 9-21, 13-21 agi tsükdakja liasü.

Tetsür tarep asaya nung Ashwini Bhat aser Shikha Gautam nata Thailand tsür Supissara Paewsampran aser Puttita Supajirakul nati 10-21, 12-21 agi tsükdaktsüogo.



Odisha Chief Minister Naveen Patnaik aser Bollywood actor Disha Patani, nati FIH Mens Hockey World Cup atema jersey sayatsüba noksa nung angur. Iba asayamung lapokba sentong nung Bollywood actor Disha Patani aser Ranveer Singh nungertemi shilem agitsü.

BILEMDANGANG

"Tebilemdangba makai tenzükba mapang nung tetsükdaktsü aika adoker."